

·siujsoz dinj·

Maqmuengh Miz Boux Vunz He Lumj Daxmeh Nei Daeuj Gyaetz Gou

渴望有一个人像母亲一样来爱我

□ Liuj Hungzyi / 柳红玉

Gou ndaej 1 bi lai seiz, daxmeh gou couh gvaqseiq lo, ndigah youq ndaw ndaejgeiq gou, doiq daxmeh gou mbouj miz maz yaenqsiengq, couh cam naiq gou, naiq gou naeuz: “Daxmeh mwngz maj ndaej gig gyaendei, caeug daxmeh Dahyieng doxdoengz.” Doek-laeng, gou baez yawjraen daxmeh Dahyieng couh ngaetz, muengh de, couh lumj muengh raen daxmeh gou.

Gou heuh daxmeh Dahyieng guh simjngeih, gizsaed de mbouj dwg caen simjngeih gou, cijdwg dou dwg vunz aen mbanj he, caezgya cungj maij heuh ndaej ndiepgyaez di. Simjngeih doiq Dahyieng gig ndei, bang Dahyieng dauz mengq, ndeiyaew dangqmaz. Gou naeuz: “Simjngeih, mwngz hix bang gou dauz mengq, baenz mbouj baenz?” Simjngeih naeuz: “Seizneix gou mbouj bienz, ngoenzrawz caiq gangj.” Gou nyinhnaeuz simjngeih gvaq song

ngoenz liux couh rox bang gou dauz mengq dahraix, couh iteig naihsim dwk caj. Hoeng, byawz rox song ndwen gvaqbae lo, gwnz gyaew gou lij dwg byoz byoem luenhnyagnyag he. Neix hawj gou engqgya hozhaenz Dahyieng lo.

Gou ceng mbouj lai ngoenz-ngoenz bae daengz ranz Dahyieng youz. Ndaw suen ranz de miz go faexmakcauj hoengz he, makcauj hoengz caengz baenz seiz, Dahyieng couh iu gou itheij bae caeg makcauj hoengz daeuj gwn. Gou naeuz: “Gou mbouj gamj, gou lau daxmeh mwngz moeb gou.” Dahyieng naeuz: “Daxmeh gou mbouj youq ranz.” Gou naeuz: “Daxmeh mwngz mbouj youq ranz gou hix lau.” Dahyieng yiemz gou mbeiiq, couh gag bae caeg makcauj hoengz. Gomakcauj hoengz miz coeg lai, Dahyieng bin mbouj hwnjbae, couh aeu

diuz faexmbaenq daeuj mboengj, cingq mboengj ndaej angq seiz, simjngeih dauqma ranz lo. Simjngeih hozhwnj swdswd, aj bak hut vunz, gaemh Dahyieng couh yaengx fajfwngz hwnjdaej yaek fak gvaqbae. Gou siengj, baez neix Dahyieng camj lo. Byawz rox, fajfwngz simjngeih yienz-naeuz yaengx ndaej sang, hoeng, roengzdaej cij gig mbaeu, bungz daengz fajnaj Dahyieng couh lumj nged yienghhaenx. Dahyieng vut roengz diuz faexmbaenq haenx, riuhaa dwk buet ok rog bae lo.

Haemh haenx, gou fangzhwnz moengh raen simjngeih hix lumj fak Dahyieng yienghhaenx, gig mbaeu dwk fak gou. Fajfwngz de dwg baenzneix unq.

Ngoenz daihngieih, gou hix lumj Dahyieng yienghhaenx, aeu diuz faexmbaenq bae mboengj gomakcauj

hoengz ranz de. Ngamq mboengj ndaej sam seiq baez, simjngeih couh daj ndaw ranz okdaej lo, de hut naeuz: “Lwg doenghduz, mwngz gawqyienz gamj daeuj caeg makcauj hoengz gou!” Gou vut diuz faexmbaenq bae, ndwn youq gizhaenx mbouj ning, caj simjngeih daeuj gaemh gou. Simjngeih gaemh ndaej gou, couh yaengx fajfwngz gig sang. Gou laepda, caj fajfwngz de dog youq gwnz fajnaj gou. Hoeng, gou cij dingqny sing “ba” gokrad, naj baihsuix gou couh youh in youh manh, ndaw bak gou youh haemz youh diemz, biq amq he daengz gwnz namh, gingqyienz dwg lwed hoengzsaksak.

Fajfwngz simjngeih neix, hawj gou yaep he couh maj lo. Baez neix liux, gou caiq hix mbouj maqmuengh miz boux vunz he lumj daxmeh nei daeuj gyaetz gou lo.

Miz Gaiq Saeh Mbouj Dwg Mwngz Yawjraen Yienghhaenx

有些事情并不是你看见的那样

Miz song bouxsien okdaej lijhingz, daengz ranz bouxmiz youq haemh ndeu. Ranz vunz neix doiq gyoengqde mbouj ndei geijlai, mbouj hawj gyoengqde youq hongq fuengz ndei ninz, cijdwg hawj gyoengqde youq aen gungx ndaw deihoengq ninz. Gyoengqde beiq mbonq seiz, bouxsien laux raen gwnz ciengz miz aen congh ndeu, couh swnhbienth coih ndei lo. Bouxsien coz couh cam vihmaz, bouxsien laux dap naeuz: “Miz gaiq saeh mbouj dwg mwngz yawjraen yienghhaenx.”

Haemh daihngieih, song bouxsien neix daeuj daengz ranz bouxhoj ndeu youq haemh he. Gvanbaz ranz neix doiq gyoengqde gig simhoengz, aeu di gijgwn ndaw ranz cijmiz okdaej hawj song bouxsien neix gwn, doeklaeng youh hawj gyoengqde ninz youq gwnz congz swheij. Ngoenz daihngieih ranzrongh, song bouxsien neix raen gvanbaz neix cingq daej. Yenzlaiz dwg duz vaiczij ranz de dai lo, duz vaiczij neix dwg goekgaen ranz neix ndaej ngaenz dog. Bouxsien coz hozhwnj dangqmaz, de vaek bouxsien laux: “Vihmaz baenz yienghneix? Ranz daih’it gijmaz cungj miz, caemhcai youh ged, doiq dou mbouj ndei, mwngz lij bang gyoengqde coih congh ciengz. Ranz daihngieih yienz-naeuz gungzhoj, hoeng lij dawzok gijgwn ranz de cijmiz daeuj dakdaih bouxhek. Hoeng, mwngz mbouj bae lanz duz vaiczij ranz de dai. Gou siengj mbouj doeng mwngz vihmaz baenzneix guh!”

“Miz gaiq saeh mbouj dwg mwngz yawjraen yienghhaenx”, bouxsien laux dap naeuz, “Dou youq aen gungx ndaw deihoengq ninz seiz, gou daj congh ciengz yawjraen baihdaw cang rim ndaekgim. Aenvih bouxcawj ranz haenx gig ged, mbouj haengj bouxwnq daeuj faenyienj doxgaiq ranz de, ndigah gou couh dienz aen congh ciengz bae, hawj gyoengqde ciengxlwenx hix mbouj rox miz aen congh cang ndaekgim couh youq ndaw deihoengq ranz de. Haemhlwenz, bouxsien guenj bouxvunz lix roxnaeuz dai daeuj daengz ranz gungzhoj neix, yaek daiq boux baz neix bae yaemgan, gou couh hawj duz vaiczij ranz de lawh de. Ndigah, miz gaiq saeh mbouj dwg mwngz yawjraen yienghhaenx.”



Seizcin gingjih Gveilinz heuswd.

·gojsaeh iq·

Okbae Gizgyae

出 远 门

Gaxgonq, miz song boux beixnuengx gag dawz aen sieng cang hingzlij he okbae gizgyae. Youq gwnz roen, aen sieng naek lai, song boux beixnuengx dawz ndaej baegfofo, yaek nyaenx mbouj ndaej lo. Song boux haenx cijndei fwngz baihsuix naet le vuenh fwngz baihgvaiz bae dawz, fwngz baihgvaiz naet le youh vuenh fwngz baihsuix bae dawz. Sawqmwh, daegbeix daengx roengzdaej, youq henz roen cawx diuz hanz ndeu, venj song aen sieng hingzlij youq song byai diuz hanz. Yienghneix, de rap hwnj song aen sieng hwnj roen laebdaeb ganj loh, gamjdaengz

dauqfanj soengswt lai lo. Daegnuengx de hix mbouj yungh caiq dawz aen sieng hingzlij naek haenx lo. Doiq song boux beixnuengx neix daeuj gangj, cungj dwg gienh saeh ndei.

Youq gwnz roen ciuhvunz raeuz, itdingh rox bungz daengz nanzcawq hauilai yienghneix roxnaeuz yienghhaenx. Hoeng, raeuz dwg mbouj dwg cungj rox, youq gwnz roen doxbae, bang bouxwnq buen ok ndaek rin dangj de laebdaeb byaij coh naj he? Miz saek seiz hix cingqngamj dwg bang swheij guh roen bw.